

顧

里

文

獻

考

閼里文獻考卷五

世系第一之五

九代騰字子襄身長九尺六寸漢高帝十二年過魯以太牢祠孔子
封騰爲奉祠君惠帝時徵爲博士遷長沙太傅年五十七卒子一忠
十代忠字子貞該通六藝有高尚之志文帝時徵爲博士年五十七
卒子二武安國

十一代武字子威爲文帝博士子一延年

十二代延年博覽羣書武帝時爲博士轉太傅遷大將軍年七十一
卒葬祖墓北子一霸

十三代霸字次孺幼有奇才從夏侯勝治尙書昭帝徵爲博士宣帝
時以大中大夫授太子經遷詹事出爲高密相元帝卽位拜太師賜
爵關內侯食邑八百戶號褒成君給事中賜黃金二百斤宅一區徙
名數於長安次孺爲人謙退嘗稱位祿太過何德以堪之帝欲致之

相位自御史大夫貢禹卒及薛廣德免輒欲拜次孺陳讓至三帝察其誠乃止上書求奉先聖祀詔以所食邑祀孔子還其長子名數於魯年七十二卒帝素服臨弔者再賜東園秘器錢帛冊贈列侯謚曰烈君子四福捷喜光

十四代福成帝時襲封關內侯年六十三卒葬祖墓北子一房

十五代房哀帝時襲封關內侯子一均

十六代均字長平本名莽避王莽名改均敦篤好學襲封關內侯徵拜尚書郎平帝元始元年六月晉封褒成侯食邑二千戶奉孔子祀五年王莽篡漢拜太尉三上書辭疾卒不就還嘗遂失爵年八十一

卒子一志

十七代志光武時拜大司馬建武十四年夏四月仍襲褒成侯食邑如故中元元年春二月帝東巡狩至於岱宗祭望秩於山川班於羣臣遂覲東后褒成侯序在東后卒謚元成子三損樹恢

十八代損字君益明帝永平十五年襲封褒成侯章帝元和二年春
二月帝巡狩岱宗崇望山川告祠明堂褒成侯助祭焉三月帝幸魯
祠孔子賜褒成侯及諸孔男女帛和帝永元四年徙封褒亭侯食邑
一千戶子二曜旭

十九代曜字君曜襲封褒亭侯子二完讚

二十代完襲封褒亭侯邑百戶早卒無子魏文帝以其弟讚之子羨
紹封

二十一代羨字子餘父讚字元賓守廟百石卒史子餘魏文帝時拜
議郎黃初二年春正月詔曰昔仲尼資大聖之才懷帝王之器當衰
周之末而無受命之運乃退考五代之禮修素王之事因魯史而制
春秋就太師而正雅頌俾千載之後莫不采其文以述作仰其聖以
成謀茲可謂命世大聖億載之師表者已遭天下大亂自祀壇襲舊
居之廟毀而不修褒成之後絕而莫繼闕里不聞講誦之聲四時不

賜崇嘗之位斯豈所謂崇化報功盛德百世必祀者哉嗟乎朕甚憫焉其以議郎孔羨爲宗聖侯邑百戶奉孔子祀令魯郡修起舊廟置百石吏卒以守衛之又於其外廣爲屋宇以居學者卒葬祖墓南子一震

二十二代震字伯起襲封宗聖侯晉武帝泰始三年冬十二月改封奉聖亭侯拜大常卿黃門侍郎食邑二百戶年七十五卒子一嶷

二十三代嶷字成功襲封奉聖亭侯年五十七卒子一撫

二十四代撫舉孝廉辟太尉掾爲豫章太守襲封奉聖亭侯子一懿

二十五代懿東晉襲封奉聖亭侯兼從事中郎卒葬祖墓西子一鮮

二十六代鮮字鮮之恢廓大度好學善教宋文帝元嘉十九年襲封

奉聖亭侯改封崇聖侯子一乘

述曰汾讀家譜及闕里志至二十二代迄二十六代之間竊不能無惑焉考晉書孝武本紀載太元十一年秋八月庚午封孔靖之爲奉

聖亭侯奉宣尼祀又宋書載晉明帝太寧三年詔給奉聖亭侯孔亭
四時祀孔子祭直如泰始故事亭五代孫繼之博塞無度嘗以祭直
顧進替慢不祀宋文帝元嘉八年有司奏奪爵至十九年又授孔隱
之兄子熙先謀逆又失爵二十八年更以孔惠雲爲奉聖侯後有重
疾失爵孝武大明二年又以孔邁爲奉聖侯邁卒子蔡嗣有罪失爵
此東晉至宋繼襲之次序也國史撰述必有考徵而言之鑿鑿如是
斷非毫無證據者今譜內並無靖之亭繼之隱之惠雲邁奉聖諸人之
系可疑者一譜載二十二代震於晉武帝泰始三年改封奉聖亭侯
二十六代鮮於宋文帝元嘉十九年襲爵奉聖亭侯若果家嫡相承
不應相距一百七十餘年所傳祇有四世可疑者二元嘉十九年封
奉聖亭侯者正史所載孔隱之也家譜所載孔鮮也事同一年名則
迥異可疑者三奉聖之名始於典午沿及宋齊梁陳迄未有改其後
魯郡折入元魏至魏孝文帝太和十九年車駕過魯詔選諸孔宗子

一人以奉聖祀遂得二十八代孫靈珍封爲崇聖侯此崇聖侯之號所自始而靈珍實始封之人也今譜內載二十六代鮮襲封奉聖亭侯又改封崇聖侯以北朝之號而混於南以孫之封而加於祖可疑者四今汾以臆度之亭與靖之繼之三人或係二十二代震之家嫡至隱之惠雲適蔡等或以大宗無人遂取旁支代襲後因鼎祚屢移子孫不嗣家乘失傳殆由於此至靈珍崛起北朝大約由於支別追溯祖父以接大宗如懿如鮮未必盡曾主鬯其所封爵或係追崇第唐書宰相世系表所載世次名字官爵皆與譜志融合是以未敢妄改又十七代志譜志皆云光武時拜大司馬建武十四年四月仍封襄成侯考光武紀建武元年七月壬午以大將軍吳漢爲大司馬至二十年五月辛亥漢薨乃以中郎將劉隆代行大司馬事二十七年改大司馬爲太尉而隆亦卽日罷終光武之世拜大司馬者止二人未聞更有孔志也又本紀載十四年夏四月辛巳封孔子後志爲

襄成侯下注引古今志云志時爲密令則其非大司馬更爲確證第
譜志本於唐表或別有據抑嘗爲其掾屬中有漏文未可臆斷故並
仍舊譜所載而辨其疑者於篇亦先聖闕文之義至九代子襄譜志
皆從史記作長沙太守考長沙是時爲封國不應有太守之官及稽
之漢書孔光傳及唐書宰相世系表皆作大傅其爲訛舛無疑不得
以妄改大史公爲嫌也

惠選恭諸人附見家譜二十七代崇聖大夫傳宋書以恭爲義興譜不合考改獻通考作恭注云訛但切必改有此也

闕里文獻考卷五終

關里文獻考卷六

世系第一之六

二十七代乘字敬山博學有才元魏孝文帝時舉孝廉延興三年夏四月詔以乘爲崇聖大夫食邑五百戶給十戶以供洒掃子二靈珍景進

二十八代靈珍仕魏爲祕書郎孝文帝太和十九年夏四月帝幸魯親祠孔子廟詔選諸孔宗子一人封爵世襲奉孔子祀有司以爲莫靈珍宜乃封爲崇聖侯食邑一百戶子二文泰文僖

二十九代文泰襲封崇聖侯年五十八卒葬祖墓南子一渠

三十代渠襲封崇聖侯子一長孫

三十一代長孫襲封崇聖侯北齊文宣帝天保元年夏六月辛巳改封恭聖侯食邑一百戶後周宣帝大象二年春三月詔追封孫子爲鄒國公遂詔長孫承襲鄒國公邑數準舊語在祀典考年六十四卒

葬祖墓西子一嗣慈

三十二代嗣慈隋文帝時應制登科授涇州司兵參軍遷太子通事舍人煬帝大業四年冬十月詔曰先師尼父聖德在躬誕發天縱之姿憲章文武之道命世膺期蘊茲素王而頽山之歎忽踰於平祀盛德之美不存於百代永惟懿範宜有優崇可立孔子後爲紹聖侯有司求其苗裔錄以申上乃封嗣慈爲紹聖侯食邑百戶年七十卒葬祖墓西子一德倫

三十三代德倫唐高祖武德九年詔曰宣尼以大聖之德天縱多能王道藉以裁成人倫資其教義故孟軻稱自生民以來一人而已自漢氏馭歷魏室分區爰及晉朝暨於隋代咸相崇尚用存享祀朕欽若前王憲章故實親師宗聖是所庶幾存亡繼絕抑惟通典可立孔子後爲褒聖侯以隋故紹聖侯孔嗣慈嫡子德倫爲嗣太宗貞觀十一年詔褒聖侯朝會位同三品食邑百戶中宗嗣聖七年賜勅書及

時服年七十一卒子二崇墓子歎

三十四代崇墓中宗嗣聖十二年襲封褒聖侯神龍元年夏五月授朝散大夫陪祭朝會年五十六卒子一璣之

三十五代璣之字藏暉元宗開元五年襲封褒聖侯授國子四門博士邠王府文學蔡州長史二十七年詔謚孔子曰文宣王以其嗣爲文宣公任州長史代代勿絕於是進封璣之爲文宣公兼兗州長史制曰朕永維聖道思闡儒風故尊崇先聖所以弘至教褒獎後嗣所以美前烈文宣王三十五代孫通直郎前守邠王府文學褒聖侯孔璣之纂承睿哲克復中庸三命益恭敦素憑於祖業百代必祀光寵被於朝恩積慶之餘既開於土宇盛德不朽宜傳於帶礪可襲文宣公尋遷都水使者天寶之亂寄居寧陵卒遂葬於寧陵子孫家焉子

一璣

三十六代璣襲封文宣公兼兗州泗水令子一齊卿

三十七代齊卿德宗建中三年襲封文宣公兼兗州功曹轉青州司
兵參軍時遭叛亂陷於東平子三惟暉惟昉惟時

三十八代惟暉初居寧陵後兵解歸魯留幼弟惟時居寧陵守先人
墓憲宗元和十三年襲封文宣公授兗州參軍年六十五卒葬祖墓

東子一策

三十九代策明經及第授曲阜縣尉武宗會昌元年歷少府監主簿
國子監丞遷尚書博士二年襲封文宣公宣宗大中元年宰相白敏
中奏歲給封戶絹百疋春秋充享祀年五十七卒葬祖墓西南子三
振拯郁

四十代振字國文懿宗咸通四年進士第一人及第除祕書省校書
郎歷兗州觀察判官監察御史左補闕水部員外郎襲封文宣公年
七十四卒葬祖墓北子一昭儉

四十一代昭儉任南陵尉授廣文館博士兗州司馬賜緋除祕書郎

襲封文宣公兼曲阜令年六十卒葬祖墓西北子一光嗣

四十二代光嗣昭宗天祐二年以齊郎授泗水主簿遭世叛亂遂失

封爵初宋元嘉間蠲魯郡民孔景等五戶供孔子廟酒掃役其裔孫

未見孔氏子孫單承門祚衰弱又多流寓他所者乘時不繩謀冒聖

裔稱世爵遂計害公卒年四十二梁末帝乾化三年也子一仁玉

述曰闕里志及家譜載三十代渠初襲崇聖侯北齊文宣帝天保元

年改封恭聖侯後周靜帝大象二年又進爵鄒國公子長孫後周武

帝宣政元年襲封鄒國公按宣政在大象之前先封其子後封其父

斷無此理且宣政年閒尚未有鄒國名號所云長孫襲鄒國公於宣

政元年者誤也再考北史齊文宣本紀天保元年六月辛巳詔改封

崇聖侯孔長爲恭聖侯孔長譜內旣無其名其爲長孫之誤無疑是

初襲崇聖改封恭聖進爵鄒國公者乃三十一代之長孫而非三十

代之渠也又闕里志載長孫二子英憲嗣憲英憲封奉聖侯無子嗣

趙襲封按長孫旣襲爵於北其子斷無再受南封之理且英悲之封在陳廢帝光大元年歲次丁亥後十四年庚子始爲周宣帝大象二年其父受封乃在其子旣襲爵十數年之後亦事之所必無者蓋英悲自是江左一派志因命名與嗣悲相同遂訛爲長孫之子其實非也况家譜及唐書宰相世系表並不言長孫有二子更爲可證再譜志又云三十二代嗣悲初襲鄒國公後改封紹聖侯考鄒國之封改於後周大象二年不踰年而周卽亡其封亦遂絕至隋煬帝始求孔子苗裔封嗣悲爲紹聖侯初封鄒國公譜志似皆有誤今旣有依據悉從更正不敢以訛傳訛啓後人之惑也

闕里文獻考卷六終

闕里文獻考卷七

世系第一之七

四十三代仁玉字溫如梁太祖乾化二年五月二十九日生孔末之亂生甫九月母張抱匿於外家既長身長七尺姿貌雄偉通六藝尤精春秋爲人嚴整臨事有果斷後唐明宗長興元年魯人憲於官曰曲阜令未非聖人後光嗣有子仁玉育於張氏今十九歲矣事聞於朝乃誅末以公主孔子祀授曲阜主簿三年遷龔邱令封文宣公晉高祖天福五年改曲阜令後周太祖廣順二年六月帝平慕容彥超幸曲阜謁林廟召對賜五品服及銀器雜綵詔以曲阜令兼監察御史年四十五卒贈兵部尚書葬祖墓東北夫人裴氏祔繼李氏封隴西郡夫人葬祖墓西後世以孔氏幾絕復興號中興祖復歲時祭其外祖張溫之墓爲置祭田立奉祀生請蠲其徭役以報之子四宜憲

四十四代宜字不疑自幼穎悟十歲能屬文以孝聞舉進士不第宋太祖乾德四年詣闕上書述其家世詔以爲曲阜主簿歷黃州軍事推官時吳越初定黃州扼江鄂咽喉公佐理戎務宣力實多太宗卽位召見遷司農寺丞掌星子鎮市征上言江左始平庶務不綱星子當江湖之會商賈所集請建爲軍朝議以戶口少陞爲縣就命知縣事後以爲南康軍太平興國三年秩滿代還轉運使王明薦公言忠行篤守法奉公乞擢居朝列委以事機入觀獻所著文賦數十篇帝覽而嘉之召見問孔氏世數具以對帝謂左右曰家世之遠有如此者乎乃下詔曰素王之道百代所宗傳祚襲封抑存典制文宣王十四代孫孔宜服勤素業砥礪廉隅承歷官聯洽聞政績聖人之後世德不衰俾登朝倫以光儒胄可擢太子右贊善大夫襲封文宣公十四代孔氏至是公以爲言帝特命復其家尋通判密州八年詔修曲阜孔廟戶至是公以爲言帝特命復其家尋通判密州八年詔修曲阜孔廟戶

子廟八貢方物爲謝批答曰素王之教歷代所宗當子治定之初特展修崇之典汝襲封闕里就列周行虔備貢輸慶茲輪奐省聞嘉獎不忘於懷遷殿中丞雍熙三年曹彬等北征契丹公受詔督餉溺拒馬河卒年四十六子三延世延澤延渥

四十五代延世字茂先以父死事賜學究出身授曲阜主簿歷知閩長葛二縣至道三年真宗卽位諭侍臣訪宣聖裔呂端以公奏召見九月戊寅詔曰叔敖陰德尙繼絕於楚邦臧孫立言猶有後於魯國豈聖人之後可獨遠於陵廟乎許州長葛令孔延世鍾裔孫之慶仕文理之朝能敦素風甚有政術宜任桑梓之地以奉蒸嘗之儀可特授曲阜令襲封文宣公帝復勉曰宜精心典祖廟祀母稍懈也賜帛五十疋銀器五十兩及太宗御書并九經咸平三年詔本道轉運使及州長吏待以賓禮見勿庭起年三十八卒子一聖佑

四十六代聖佑年九歲授同學究出身大中祥符元年真宗東封泰

山公年十一賜衣綠陪位綴宗官班後帝還幸曲阜謁孔子林廟改曲阜爲仙源縣授公太常寺奉禮郎後改大理評事掌本縣錢穀天禧五年襲封文宣公以光祿寺丞知仙源縣事遷贊善大夫終太子中舍年三十五卒無嗣以從弟宗愿襲爵

宗愿字子莊父延澤贈諫議大夫仁宗天聖中公以從父道輔蔭補太廟齊郎寶元二年授國子監主簿襲封文宣公知仙源縣事至和二年直集賢院祖無擇建言臣竊觀前史孔子之後襲封者在漢魏則自襄成襄聖宗聖在晉宋曰奉聖後魏曰崇聖北齊曰恭聖後周及隋封以鄒國唐初亦曰襄聖或爲君或爲侯爲公爲大夫使奉祭祀至開元二十七年追謚孔子爲文宣王始以其後爲文宣公是以祖之美謚而加後嗣生而謚之不經甚矣乞明詔有司詳求古制或封以小國或取尊儒襄聖之義別定美號加以封爵著於令式使千古之下無以加於我朝之盛典也奏上帝下兩制議集賢殿學士劉

敬言臣等謹按漢元帝初元元年以師孔霸爲關內侯食邑八百戶
號襄成君霸卒子福嗣福卒子房嗣房卒子莽嗣皆稱襄成君至平
帝元始元年始更以二千戶封莽爲襄成侯而追謚孔子曰襄成宣
尼公以此觀之則襄成者國也宣尼者謚也公者爵也襄成宣尼公
猶曰河閒獻王云耳蓋推宣尼以爲襄成祖非用襄成以爲宣尼謚
也唐世不深察此義而以襄成爲夫子之謚因疑霸等號封襄成皆
襲其祖之舊耳故遂封夫子文宣王而爵其後文宣公考核本末甚
失事理先帝旣封泰山親祠闕里又加文宣以至聖之號則人倫之
極致盛德之顯名盡在此矣尤非其子孫所宜襲處而稱之者也臣
等以爲無擇議是可用其文宣王四十七代孫宗慮伏乞改賜爵名
若襄成奉聖之比上足以尊顯先聖有不可階之勢下不失優孔氏
使得守繼世之業改唐之失法漢之舊傳曰必也正名又曰正稽古
立事可以永年此之謂也詔曰孔子之後以爵號襄成世不絕其

來遠矣自漢元帝封爲襄成君以奉其祀至平帝時改爲襄成侯始追謚孔子爲襄成宣尼公襄成其國也宣尼其謚也公侯其爵也後之子孫雖更改不一而不失其義至唐開元中始追謚孔子爲文宣而尊以王爵封其嗣襄聖侯爲文宣公孔氏子孫去國名而襲謚號禮之失也蓋由此始朕稽考前訓博採羣議皆謂宜法漢之舊革唐之失稽古正名於義爲當朕念先帝崇尚儒術親祠闕里而始加至聖之號務極尊顯之意肆朕纂臨繼奉先志尊儒重道不敢失墜而正其後裔嗣爵之號不其重與宜改至聖文宣王四十六代孫宗愿爲衍聖公尋遷尚書比部員外郎通判濰州卒於官葬祖墓西子四若蒙若虛若愚若拙

四十七代若蒙字公明神宗熙寧元年二月襲封衍聖公爲仙源縣主簿哲宗元祐元年授承奉郎用族叔知兗州宗翰議改封奉聖公專主祀事不預他職遇郊祀大禮赴闕陪位元符元年坐事廢以弟

若虛襲子二端友端操

若虛字公實，襲封奉聖公。徽宗崇寧中卒，子一端本復改奉聖公爲衍聖公。仍以若蒙之子端友繼封。

述曰：中興祖去今未三十世，子孫繁衍已二萬餘人。乃其先一夫肆逆九族，崩潰孔氏之危不絕如髮。蓋緣唐室陵遲，鎮藩跋扈，兵戈擾攘，民不聊生。重以黃巢、朱李之亂，戶口日益凋喪。而士大夫之仕於外者又多輕去其鄉，不歸井里，以致門祚衰弱，禍起家奴。雖曰天數抑亦人事之過也。使當日聚族而居，其勢有以相維，而力又足以相敵，雖百孔末亦奚爲哉？詩云：「宗子維城。」信矣夫。

關里文獻考卷七終

闕里文獻考卷八

世系第一之八

四十八代端友字子交宋徽宗崇寧三年襲封衍聖公制曰自書契以還爵於朝者多矣未有傳世四十而不絕者也惟爾文宣王之後次當承襲宜錫文階並示寵渥往加恪慎務保厥榮宣和三年轉通直郎除直祕閣賜緋章服仍許就任關陞高宗南遷建炎二年冬祀赴揚州陪位不克歸遂寓於三衢終郴州知州卒無子以弟端操之幼子玠嗣

四十九代玠字錫老宋高宗紹興二年嗣世父襲封衍聖公制曰夫子踰於堯舜澤及萬世靡有所窮欽崇碩報邦有彝典肆予命爾紹於世封惟欽惟懿則無墜命子一指

璠字文老父端操四十七代奉聖公次子也紹興三年僞齊劉豫授爲迪功郎襲封衍聖公管勾祀事劉豫廢封絕金熙宗天眷三年詔

求孔子後十一月乃以璠爲承奉郎襲封衍聖公卒年三十八贈榮祿大夫葬祖墓西子三拯摶搏

五十代摶字季紳宋高宗紹興二十四年授右承奉郎襲封衍聖公制曰仲尼之道垂休萬世自生民以來未有盛於此者襲封奉祀宜及後昆以爾重厚深醇世系可考選其乃事是遵典常命以京秩畀以公圭非特爲爾身榮實所以尊聖也往其懋哉子一文遠

拯字元濟金熙宗皇統二年春正月授文林郎襲封衍聖公時年八歲廢帝天德二年定衍聖公俸格加於常品尋晉承直郎世宗大定元年二十六卒葬祖墓西南無子以弟摶襲封

摶字元會少穎悟三歲而孤及長能力學自強通左氏春秋金世宗大定三年授文林郎襲封衍聖公嚴潔祭祀敦睦族黨時兵燹後廟傾圮公愀然曰生爲聖人後而繆當其職坐視阽阤如此寧不愧於心乎乃親率佃戶東之蒙山伐取材木增修寢殿及尼防殿宇廊廡

五十餘楹二十年冬十二月召至京師帝欲官之尙書省言撝主先
聖祀事若加任使守奉有闕乃授曲阜縣令未任時歲方大旱既下
車甘雨三日歲大熟勤於吏事案無畱牘舊夏網凡丈尺小戶合并
全疋輸納吏胥恣爲奸利公止令依市價積算輸納舊弊盡革縣城
壞官計修築戒董者曰慎勿折廬舍壞冢墓有礙者當隨地築之其
死而無主枯骨暴露者盡以己俸收葬碑曰叢冢後終奉直大夫年
五十三卒贈光祿大夫子二元措元紘

五十一代文遠字紹先宋光宗紹熙四年授承奉郎襲封衍聖公制
曰孔子之後自漢以來世俾襲爵國家崇儒重道又過前代於是有
衍聖公之封爾於世次實當給續其務格恭以承祭祀子一萬春
元措字夢得初父摠年已四十生數子皆不育及宰曲阜收葬枯骨
夜夢眾人來謝一人稍前曰嗟哉暮雲之弗及旣寤又搜得十餘骸
并葬之已復夢其人來謝曰今子非爾子後丑年庚月丁日所生真

爾子矣常名元措已果得子因卽以名之而字夢得金章宗明昌二年四月襲封衍聖公制曰聖謨之大儀範百王德祚所傳垂光于祀蓋直道以經世宜承家之有人文宣王五十一代孫孔元措秀阜衍祥清洙流潤芝蘭異稟蔚爲宗黨之英詩書舊聞蚤服父兄之訓語年雖妙論德已成肆疏世爵之封乃煥章身之數非獨增華於爾族固將振耀乎斯文勉嗣前修用光新命又詔衍聖公視四品階止八品不稱超授中議大夫著爲令承安元年冬十一月帝行郊祀禮召赴闕侍祠位在終獻之次二年詔兼曲阜令仍世襲貞祐二年宣宗徙都汴公赴行在時丁母憂遜授東平府通判詔以來春赴任後宣宗念東平土寇竊發欲保全之令與隨朝職事乃改授太常博士興定四年改行太常丞元光元年授同知集賢院兼行太常丞袁宗正大二年授知集賢院兼太常丞天興元年遜授泰定軍節度使兗州管內觀察使兼行太常少卿三年遷光祿大夫尋晉太常卿時元兵

伐金汴京失守元太宗命公還東平仍襲封衍聖公主奉祀事踰年
金亡公上言於太宗曰兵興以來禮樂散失燕京南京等處亡金太
常故臣及禮冊樂器多有存者乞降旨收錄太宗可其奏詔各處管
民官如有亡金知禮樂舊人可并其家屬徙赴東平令元措領之於
本路稅課所給其食十一年公奉詔至燕京得金掌樂許政掌禮王
節及樂工翟剛等九十二人夏四月建登歌樂於曲阜宣聖廟就東
平造樂器製冠冕法服鐘磬符箋儀物後禮樂建習既成召樂人至
日月山試奏於帝前遂用以祀上帝元朝一代禮樂公實始創之卒
無子以弟元紘之孫湊嗣爵

五十二代萬春字耆年宋理宗寶慶二年襲封衍聖公制曰朕聞盛
德百世必祀况詩書仁義之澤涵浸生民炳然至今者乎爾承休聖
門端有傳緒屬當大補仍續世封恪共蒸嘗嘗勉家業東魯文獻於
此有考焉不亦善乎子一洙

五十三代洙字景清宋理宗紹定四年襲封衍聖公通判吉州宋亡歸元元世祖議孔氏子孫當立者或言孔氏子孫寓衢者乃其宗子至元十九年冬十一月召至闕勞問洙遜於居曲阜者帝嘉之曰寧違榮而不違親真聖人後也遂命爲國子祭酒承務郎兼提舉浙東學校事與護持林廟聖書勅給俸祿秩滿再授奉訓大夫儒學提舉年六十一卒無嗣自端友至洙襲封於衢者蓋六世云

湊字昭度祖元紘幼孤不好游戲及長敦厚慎默不談人之非粗衣糲食一無所擇仕金至安遠大將軍武昌節度判官父之固湊於元憲宗元年襲封衍聖公喜較獵日事鷹犬不修祖祀明年曲阜管民長官治卒族人等以不事儒雅攻之且言湊非孔氏子遂奪爵湊本之固庶子嫡母任甚妬遣其生母湊時甫生隨母配驅口李氏長途訟其爲驅口李氏子旣奪爵其母任氏悔之爲上疏辨雪不報後知

金子世爵在北者中絕四十三年至成宗卽位以治紹封
治字世安六世祖若愚字公直四十六代衍聖公宗願第三子也五
世祖端立字子植金時權主祀事高祖琥字西老曾祖拂字文通並
授進義校尉祖元用字俊卿金宣宗貞祐二年歲在甲戌衍聖公元
措赴汴以元用代攝祀事壬午年宋收復京東西路甲申年乃授元
用爲通直郎乙酉年宋新復諸州復入於元丙戌年元郡王帶孫攻
益都以元用有將略授以兵使隨征丁亥年卒於軍父之全字工叔
元用之隨征也之全以迪功郎爲曲阜縣尹權主祀事癸巳年元克
金汴都取元措還乃罷主祀事專尹曲阜縣治於元憲宗二年充曲
阜管民長官世祖中統元年襲世職縣尹四年權主祀事至元十三
年授承事郎時廟庭罷酒掃戶祭不用公家錢治每遇祀事粢盛牲
醴必以豐潔辛曲阜二十餘年內撫百姓外給軍旅以才幹著聞二
十二年授奉訓大夫單州防禦使以其子思誠代爲曲阜尹將行戒

其子曰毋妄怒輕笞楚人邑中長者視之如父兄幼者撫之如子弟以無負乃父訓及至單州興學校正風俗聽訟平允人自不免二十九年遷奉直大夫知密州成宗元貞元年赴闕大臣言治孔子裔孫其祖元用有軍功沒於王事治權奉祀事三十餘年襲封爵莫宣治詔從之授中議大夫襲封衍聖公卒年七十二子一思誠以世襲縣尹嗣公爵尋以非嫡罷封止世襲縣尹遷國子監丞安慶路推官陞知恩州丁內艱不赴繼拜江南湖北道肅政廉訪司僉事皆不赴以朝列大夫知濮州致仕清勤奉職所至皆有名子克欽世襲曲阜尹別有傳

右南北宗衍聖公皆四十六代公宗憲之裔也宗憲長子若蒙生端友端操端友無子以端操幼子玠嗣至洙六世是爲南宗自洙無嗣而南宗者絕北宗端操生璠璵璠生拯摶摶生元措元紘元紘生之固之固生湧摶生元泰元讓瑣生括括生元衡宗憲次子若虛生

端本端本生璋璋生抃抃生元隆挺生元錫宗愿第三子若愚生
端栗端立端栗生珵端立生琥琥生拂拂生元直元孝元用元孝生
之厚之厚生浣自浣以上若拯元措湏元泰元讓元衝元隆元錫珵
元直皆無嗣惟浣有子思晦以次相推最爲宗長當端友之隨宋南
渡也弟端操權主祀事其後璠拯元措湏皆循次繼立自湏之失
爵元人在兵戈擾攘間未暇講求所當立者輒以元用有軍功死王
事封其孫治治又傳子思誠非立嗣法也故大宗之統歸於思晦始
爲得其正云

述曰不有遷者誰共社稷不有居者誰奉蒸嘗衍聖公在宋金元之
交南北各受其封是也然於四郊多疊之際而能守其傳器弗墜厥
宗則居者視遷者爲尤苦况世爵原爲奉嗣匪僅榮我孫子洙之能
讓可謂深知大義者至洙宜有後於闕里乃世絕不爲立嗣致啓異
日有以弟爲子之說然後從而辨駁之則亦前人之過也兩宗子或

以故他出因命其子弟代主祀事故有權驛之名而金元之間又率由省臣劄委並非實膺世爵今家譜內於代攝祀事者皆曰權襲封衍聖公蓋盡失其實也又志載五十一代元用於寶慶元年宋克山東時權襲衍聖公仙源令二年改濟州通判及元太師國王木華黎兵至承制封拜又權授襲封衍聖公乙酉年從太師征益都考宋元二史宋寧宗嘉定十五年歲在壬午大名忠義彭義斌復京東州縣越三年乙酉是爲宋理宗寶慶元年京東州縣已盡陷於元矣今云寶慶元年復山東二年判濟州者皆誤也又元太師國王木華黎死於癸未三月至寶慶二年沒已四載不應尙能統兵拜爵考攻益都者乃木華黎之弟郡王帶孫也又其事在丙戌並不在乙酉所云乙酉太師攻益都者亦非也且南宋之時有南宋衍聖公文遠在收復山東或以元用爲仙源令理似有之若封以世爵則置在衢者於何地此事之所必無者况寧宗本紀十七年甲申正有授孔元用爲通

直郎並無權襲封衍聖公語此尤信而可徵者也蓋緣南北紛爭間見異說家乘所記雜取後人追述之碑志是以不無舛錯今悉据正史更正如左而疑者則仍闕焉以俟後之博覽者

闕里文獻考卷八終

調里文獻考卷九

世系第一之九

五十四代思晦字明道高祖拂進義校尉曾祖元孝祖之厚贈亞中大夫濟寧路總管輕車都尉魯郡侯父浣字日新贈通議大夫禮部尚書輕車都尉魯郡侯公生而端重簡默童稚時讀書已識大義導江張頤教授三氏學公受業焉講求義理不爲詞章學雖劇寒暑不廢業家貧躬耕侍養遠近爭師之元大德中游京師祭酒耶律有尙欲薦之以母老辭歸母寢疾衣不解帶居喪勺水不入口者五日至大中舉孝廉爲范陽儒學教諭延祐初調寧陽在職以儉約自厲教養有法比離任諸生皆不忍舍去當是時衍聖公思誠以支庶襲爵爲族人所不服而公於序爲嫡長且賢於是族之人請於朝願以公嗣襲政府未決會仁宗雅尙儒術一日問儒臣曰孔子之裔以世次應襲爵者爲誰元明善以公名對帝復取譜牒考之乃罷思誠而以

公爲中議大夫襲封衍聖公給四品印月俸自百緡加至五百緡蓋延祐三年六月也泰定四年山東廉訪副使王鵬南言衍聖公爵上公而階止四品於格弗稱且失尊崇意詔陞嘉議大夫至順三年少監歐陽元又言衍聖公爵最五等秩登三品而用四品銅印不稱詔改給三品銀印公以宗祀責重恆懼弗勝每遇祭祀必敬必慎初廟燬於兵火後雖苟且完葺而垣牆角樓未備公竭力營度頓復舊制金絲堂壞又新之祭器禮服悉加整飭又以尼山乃毓聖之地故有廟久毀民冒耕祭田且百年公復其田里請置書院立學官時廷議未決後卒從之三氏學舊有田三千畝在沛縣之刁陽久爲豪民所占官利其賂庇之子思書院舊有營運錢萬緡貸於民取子息以供祭祀久之民不輸息并負其本公皆理而復之又爲先聖考妣請加封王號奏設司樂管勾典籍等官廟庭規制悉復承平之舊初孔未

宗譜公曰是賊與吾宗爲世讎不辨將益孽於是大會族人斥之復刻宗譜於石以垂永久焉順帝元統元年春三月卒年六十七謚文肅卒之日有鶴百餘鳴舍上神光自東南降於舍北至正中贈通奉大夫河南江北等處行中書省參知政事護軍追封魯郡公葬祖墓西配張氏封魯郡夫人子一克堅

五十五代克堅字環夫少廓達通敏日誦千餘言通左氏春秋又工爲樂府順帝至元六年冬十一月授嘉議大夫襲封衍聖公請修飾廟像詔賜山東歷日錢之半給其費復令監察御史思立持楮幣二萬五千緡勒碑以紀成績至正八年四月乙亥帝幸太學中書謂公爵與階不稱詔晉中奉大夫賜二品銀章十五年平章政事達世帖木爾薦公明習禮樂徵爲同知太常禮儀院事以子希學襲爵是年冬帝親郊以公攝太常卿御史大夫雪雪言公材宜侍從拜中臺治書侍御史辭歸明年拜山東道肅政廉訪使復辭會山東兵亂公北

行次棗城帝以丞相太平薦遣使就起爲集賢直學士十八年毛貴犯畿甸詔徵四方兵入衛廷議棄燕遷關中公曰天子當與社稷共存亡豈可他徙今勤王兵頗衆與決戰盜可平也後盜果敗去如公言十九年遷禮部尚書知貢舉時四方士多避亂京師公請設流寓科以取之是年冬擢陝西行臺侍御史二十一年李思齊及察罕帖木爾軍相攻隴蜀閒朝廷不能制陝西行省丞相帖里帖木爾納思齊降將命張良弼禦之公與中丞袁渙固爭不可且曰二軍不敢舉兵犯奉元者豈其力不足哉以無名耳今納其叛將而出兵禦之是引虎使噬也不聽渙被劾去公歎曰謀之不臧亂且至矣亦自効而歸月餘二軍攻良弼戰於鹿臺奉元果陷二十二年除國子祭酒謝病歸起集賢直學士不就又以爲山東廉訪使亦不拜明太祖洪武元年徐達下濟寧公抱病命子希學入覲尋復力疾赴京師行次淮安會帝亦以手詔趣之曰爾祖宗並教萬世子孫賓職王家代有崇

榮非獨今日吾奉天命安中夏雖起庶民然古人由民而稱帝者漢之高祖是也聞爾辭疾未知實否若無疾稱疾以慢吾國不可也諭至思之公奉詔惶恐兼程進召見謹身殿間以年對曰臣五十三帝曰爾年齒未邁而病嬰之今不煩爾以官爾家先聖後子孫不可不學爾子溫厚尚勵以克勤先業公頓首謝卽日賜宅一區馬一匹米二十石又賜田一頃明日復召見命以訓率族人因顧侍臣曰養以祿而不任以事以先聖後特優禮之也居二年慰勞時至郊社必致膳肉三年春以疾請歸遣中使日存問詔乘傳還里賜白金文綺三月丁巳卒於下邳新安驛舟中年五十五葬祖墓西配張氏封魯郡太夫人子九希學希說希範希進希麟希鳳希順希尹希贊五十六代希學字士行性明敏好學年二十一以父徵同知太常禮儀院事乃襲封衍聖公益自樹立於經籍子史之書靡不研究文詞爾雅每賓客談笑揮灑爛然可觀善隸法四方求得者皆什襲

藏之元季之亂隨父北行至藁城拜祕書卿封爵如故明太祖洪武元年入覲南都召對敷陳歷代治亂甚悉帝嘉納之詔衍聖公及世襲知縣官屬並如舊制仍免子孫徭役又進行聖公秩二品階資善大夫賜之誥曰古之聖人自羲農至於文武法天治民明並日月德化之盛莫有加焉然皆隨時制宜世有因革至於孔子雖不得其位會前聖之道而通之以垂教萬世爲帝者師其孫子思又能傳述而名言之以極其盛有國家者求其統緒尊其爵號蓋所以崇德而報功也歷代以來膺襲封者或不能繩其祖武朕甚愍焉當臨御之初訪其世襲者得五十六代孫孔希學大宗是紹爰行典禮以致褒崇爾其勤敏以進學恭儉以成德庶領袖世儒益展聖道之用於當世以副朕之至望豈不偉與復手勅中書省下所司優其廩給下逮僕從勿使有之又賜襲衣冠帶正旦朝賀命班亞丞相其後歲覲屢降手勅慰勞給符乘傳恩禮倍至公在位適當兵戎之後廟庭廊廡圮

壞祭器樂器法服不備祀田荒穢而責逋賦者孔亟公上言乞命有司修治且減免賦役並從之七年又詔免本戶稅糧三十頃十四年秋九月己丑卒年四十七帝爲悲悼親製祭文遣行人張濟民致祭配董氏贈魯郡夫人繼配孫都思氏子一訥

五十七代訥字言伯魁梧厚重寡言笑篤學恭謹不以貴驕人尤工篆法洪武十六年孝慈皇后崩入臨葬孝陵畢召見帝顧謂廷臣曰孔訥眞聖人子孫也賜膳光祿館於太學遣尚書劉仲質勞問將俾襲爵公以居喪辭乃止服除十七年正月朝京師帝命禮官卜日受爵迺以二月庚午受封是日百僚班列勅禮官以教坊樂導送至太學學官卒諸生二千餘人迎成賢街觀者如堵明日入謝復賜襲衣宴於禮部又明日釋奠於太學以拜命告恩禮之加古未有也帝既革丞相官令衍聖公班文臣首時吏部以故事請用資善階帝曰旣爵公勿事散官賜誥以織文玉軸與一品同遂爲故事建文二年秋

九月戊寅卒時年四十三配陳氏繼配商氏王氏子四公鑑公鐸公
鈞公鐸

五十八代公鑑字昭文生而岐嶷長益端厚簡重事親尤以孝聞建
文二年襲封衍聖公四年年二十三夏四月乙亥以疾卒八月丙寅
帝遣行人左誠諭祭葬祖墓西配胡氏子一彥縉

五十九代彥縉字朝紳名與字皆仁宗在潛邸時所命也幼孤母胡
太夫人教育之屹然端重如成人永樂八年年十歲襲封衍聖公召
見時言動進退從容詳雅帝喜曰真聖人裔也公旣襲爵篤志讀書
才識益高廣度量寬而有容人或以非禮至者不與校一時公卿士
庶咸敬而愛之洪熙元年仁宗語侍臣曰外藩貢使皆有公館衍聖
公假館民聞非崇儒重道意乃賜第於東安門北宣德四年公將遣
使市書福建咨禮部部臣以聞帝命市與之尋奏闕里雅樂及樂舞
冠服敝壞詔命所司修治正統元年母胡太夫人卒朝廷遣行人李

春諭祭九年奏請三氏學設生員報可十四年祖母王太夫人卒遣
行人邊永諭祭景泰元年帝視學公應召率三氏子孫赴京觀禮三
年朝覲改賜三臺銀印玉帶織金麒麟衣六年爲族人克煦等所託
帝不直克煦等置弗問冬十月癸亥卒年五十五命禮部治喪工部
治墳塋葬祖墓西配夏氏洪熙元年封夫人子四承慶承吉承澤承
源

六十代承慶字永祚幼端敏有至性年十一遭母夏夫人憂居喪秉
禮有成人所不及者既長刻苦自厲從新安江湜清江裴侃及族祖
克晏學通尙書性耽吟咏著有禮庭吟槩傳世景泰元年年三十一
未襲爵卒六年以子襲爵追贈行聖公配王氏封夫人子二宏緒宏

泰

六十一代宏緒字以敬幼失怙甫八歲祖又卒族人因其幼弱肆爲
侵侮祖妾江訴諸朝詔遣禮部郎治喪而命公族父少詹事公恂理

家事冬十二月驛召至京襲封衍聖公陞見之日帝見其尙垂髫命宮人卽廡下剔之俾歸遺其母親賜玉帶以軀尙小去二鎊授之又賜金章曰謹禮宗德節敍授一人課其學又降旨戒族人共加保護敢有挾長恃強欺陵侵害者許具實以聞復特封其庶祖母江爲夫人英宗復辟入賀朝見便殿帝握其手置膝上語良久時公甫十歲進止有度帝甚悅賜白金文綺帝聞其賜第湫隘以大第易之凡郊祭大典及南城賞花西苑較射皆與焉成化元年春三月帝幸太學應召陪祀分獻沂國公五年夫人李氏卒遣官諭祭賜葬公在位多所興建請給三氏學印開族人歲貢格蠲族人田租十之七皆得旨報可然少貴多過舉五年以宮室踰制被劾奪爵下廷臣議宜襲者姦言世嫡相傳古今通義乃據宋若蒙若虛故事以請命其弟宏泰代襲而後仍歸其子弘治十一年從按臣請復其冠帶明年六月祖廟灾弟方在朝公率子弟奔救素服哭廟蔬食百日如居喪禮十七

年春二月癸巳卒年五十七遣布政使司參政冒政諭祭賜葬祖墓
西配李氏繼配熊氏袁氏皆封夫人子二聞韶聞禮

宏泰字以和美丰儀善議論成化六年代兄襲爵帝命曰惟學可以
希望惟德可以繩先爾尙進學修德統率族人母恭聖裔以副朕懷
十七年母夫人王氏卒帝遣行人汪舜民諭祭賜葬弘治元年春三
月帝幸太學應召分獻兌國公十二年入朝聞祖廟灾奔歸引咎乞
罷弗許十四年累以疾請休又弗許公生八月而孤事母極孝襲世
爵與兄友愛無間言十六年夏五月庚辰卒年五十四事聞帝遣行人
諭祭者五命有司營葬事贈賛有加特廕其子五經博士配孫氏
成化十二年封夫人子一聞詩

六十二代聞韶字知德弘治十六年冬十月襲封衍聖公公弱冠嗣
封儀度秀整恩遇優隆榮動朝寧一時紳士咸贈言以送其行彙刻
成集名曰振鶯正德三年上言孔氏稅糧在成化間曾以五十六代

孫克煦奏請恩免三分之一今聖裔貧困者甚多乞盡賜蠲免詔從之四年曲阜世職知縣缺公循例選舉族人承章承周等奏許公選舉有私帝以承章等所奏多虛量加譴責而世尹竟不用所舉者已而承章等猶欲奏辨帝怒責戍廣西乃加賜璽書令約束族人勅曰我太祖高皇帝崇重爾祖之道卽位之初首命訪求大宗之裔襲封衍聖公旣又擇其支裔之良者授曲阜縣知縣世守其職著在令典累朝遵行茲惟我國家之盛事非獨爾一家之榮也近者曲阜缺知縣爾及族長舉事人等遵故事共舉一人而族人孔承章承周乃懷挾私憚越關赴京連名奏詳該吏部參酌覆奏別用一人以承章等所奏多虛薄示罪責顧潛住京師復謀奏擾緝事衙門發其事遂命錦衣衛鎮撫司究問本當照依榜例處治但念先聖子孫免枷號決打俱發戍廣西邊衛夫先聖之道垂憲萬世朝廷用之以爲治天下之法在爾輩守之則爲治家之法承章等首開訟端毀誣宗子以朝

廷名爵爲私家爭奪之具是先聖不肖子孫也遷發遠方小懲大戒
正用先師家法爲之教不肖子孫耳先聖嘗言其身正不令而行爾
聞韶尙佩服家訓進學修德與族長舉事管理族人讀書循禮以稱
朝廷崇重至意今後再有恃強挾長朋謀脅制不守家法爲聖門之
玷者爾卽指名具奏國典具存必不輕恕六年薦盜劉六劉七起侵
犯闕里殘毀聖廟冠退公悼焉明年白巡撫趙璜欲城闕里會僉事
潘珍別有奏得遷縣城衛廟八年春三月帝幸太學使召公陪祀命
分獻沂國公公以禫服辭乃止嘉靖元年十二年兩次幸學皆應召
陪祀分獻四配生母江繼母袁卒並賜祭葬如禮二十五年春二月
戊戌卒年六十五帝遣行人劉祿諭祭者九賜葬祖墓西配李氏繼
配衛氏俱封夫人子二貞幹貞寧

六十三代貞幹字用濟嘉靖二十五年襲封衍聖公三十年入朝
秋七月有疾帝遣御醫徐偉來視八月甲午卒於京邸年三十有八

遣禮部侍郎袁煥諭祭行人何煃護喪歸里贈卹祭葬悉如先公禮
葬祖墓西配張氏封夫人子一尙賢

六十四代尙賢字象之嘉靖三十五年襲封衍聖公時年十四歲巡
撫丁以忠上言尙賢少年宜如宏緒例肄業國學詔從之四十一年
公上疏言族屬繁衍家範日弛往往違度干紀無以仰稱朝廷崇重
至意秋九月帝賜勅曰惟我祖宗列聖稽古右文崇儒重道於先師
孔子特隆象賢之典其大宗之裔錫爵嗣封承奉祀事統攝宗人其
支庶之衆亦加優遇肆朕率循舊章憲禮益至顧族屬既繁哲愚非
一往往干犯國憲有玷聖門茲特賜爾勅諭令爾尙賢督率族長舉
事管束族眾俾各遵守禮法以稱朝廷嘉念至意爾宜修德謹行以
身先之如有恃強挾長朋謀爲非不守家法者聽爾同族長查照家
範發落重則指名具奏依法治罪爾其欽承之隆慶元年秋八月帝
幸大學應召陪祀命分獻三年又賜勅諭令公約束族人保舉賢德

而繩其不率者萬歷四年秋八月帝幸太學遣行人召取入京時公正居祖母衛太夫人憂以服辭乃止七年詔衍聖公朕以賓禮待之今後自賀萬壽節外母常朝二十二年命公長子衍椿爲公世子賜二品冠服天啓元年冬十一月辛酉以疾卒於京師賜年第年七十八明年夏五月遣禮部尙書孫慎行諭祭行人盧時泰護喪歸葬命工部造墳葬祖墓西崇禎元年追贈太子太保配嚴氏封夫人公邃於學嘗語人曰人之心體本自湛然習氣蒙之憧擾四出惟以明還明朗若初體則學之能事畢矣外而事業千流萬派總發源於此聞者爲之憬悟子二長卽衍椿次衍桂襲五經博士皆早卒無子乃育從弟尙坦子衍植爲嗣及卒以衍植紹世爵焉

述曰五十四代公始正嫡封適承大亂之後於祖廟禮樂之事興復爲多五十五代公紹修家學襄謗朝端政績風規卓乎偉矣自明祖優禮聖公待以上賓而不煩以庶政故後之紹封者自修明祀事而

外舉無他事可紀述然率祖攸行即可動無過舉詩云在彼無惡在此無斁庶幾夙夜以永終譽蓋貴夫能永終譽者也

閩里文獻考卷九終

闕里文獻考卷十

世系第一之十

六十五代衍植字懋甲祖貞寧字用致明嘉靖二十五年襲五經博士父尙坦字安之藍生公蚤歲而孤事母以孝聞旣壯恢廓大度似儻有志節萬歷四十七年襲五經博士天啓元年六十四代公入南京師寢疾賜第念二子皆不祿大宗不可無嗣遂召公往立爲子及卒乃以公襲世爵公旣拜命益自謹惕虔共廟祀輯睦宗族下至林廟屯佃戶屬皆休養矜恤一務惇大向家譜惟有抄本公始刊諸木俾支派井然而覬冒者無敢竄入孔氏子命名舊有一定輩次以序宗派辨昭穆公至是增定六十六代以下輩次十字曰興毓傳繼廣昭憲慶繁祥五年春三月熹宗幸太學應召陪祀疏請贈本生祖父母帝從之又以兄衍椿爲大宗嫡長早世無嗣不獲承祧亦請贈如其爵破例得報皆前此未有也七年三殿告成加太子太保崇禎三十一年夏六月薨

年晉太子太傅十三年山左大饑疫癘繼作公奏請蠲糧稅復出己資糴穀以濟活者數千人是歲姚賊倡亂率眾數萬圍闕里公登城曉以忠義諭以利害羣盜感泣羅拜而去莊烈帝初卽位視學十四年復臨雍兩次皆入京陪祀甲申我

朝定鼎山東撫臣方大猷奏言先師孔子爲萬世道統之宗

本朝開國之初一代綱常培植於此禮應

勅官崇祀復衍聖公并四氏翰博等之封可卜國脈靈長人文蔚起謹詳列歷朝恩例以備採倣而行一孔子嫡孫歷代封爵不一悉載史冊至宋仁宗始封爲衍聖公至明賜正一品服色麟袍玉帶三臺銀印列文臣班首歷傳至今一衍聖公長子至十五歲欽授二品服色至崇禎年間加玉帶一衍聖公長子則承大爵次子至十五歲則授以世襲翰林院五經博士以主子思子祀事三子則襲太常寺博士主汶上縣聖澤書院祀事每隨一代公爵遞爲更授一天下州縣皆

用流官獨曲阜用孔氏世職以宰此邑者蓋以大聖之子孫不使他人統攝之也其官先由衍聖公保舉貢能孔氏任事後改考選廩膳生員德行兼優者以授此職五年任滿照例考選陞轉一四氏學獨用學錄者蓋以比隆國學亦以聖賢之子孫不與他學同也其官亦自孔姓生員中德行兼懋者由衍聖公咨部授職一尼山乃孔子發祥之地設學錄一員主其祀其官係衍聖公弟姪中選德行兼異者咨部授職一洙泗書院乃孔子闡教之地亦設學錄一員主其祀其官於孔氏中選舉德行秀異者由衍聖公咨部授職一衍聖公屬官員役明洪武元年欽設管勾一員司五屯錢糧司樂一員司樂舞生典籍一員司禮生書籍掌書一名司文移書寫一名司繕寫知印一名司印務奏差一名司差遣以上俱由衍聖公保舉堪用人數咨部銓用一孔廟祀田歷代各有欽賜至明洪武二年欽賜祭田二千大頃坐落兌屬二十七處載在闕里志可考一五屯佃戶係洪武二年

欽撥民閒身家無過俊秀五百戶湊入二千丁見丁百畝佃種五屯
祭田辦納籽粒以供本廟祭祀等項支用其民間一應雜泛差役俱
行蠲免一孔廟戶丁歷代欽撥不一自明洪武二年撥民間俊秀子
弟一百一十五戶以供本廟洒掃至今或死於荒或死於盜十存一
二至於洒掃寥寥無人此又不可不加意者也一孔廟每年四時祭
祀樂用六佾額設樂舞生二百四十名於兌屬二十七州縣遴選民
間俊秀子弟以授斯役其本生一應差徭與廩膳生員事例一體優
免仍免本戶人二丁以供本生往返盤費一孔廟禮生每月朔望及
四時祭祀在本廟引贊禮儀額設禮生六十名於曲阜縣選用民間
俊秀子弟以供本廟奔走其優免例與樂舞生同以上各條皆天下
所仰爲盛典後世傳之以爲美治者也奏上

世祖章皇帝曰先聖爲萬世道統之宗禮當祭祀昭朝廷尊師重道至
意本內所開各款俱應相沿期於優渥以成盛典經禮臣議覆得

冒允行公乘傳入覲

上遣官迎勞於邸第給餼廩

陛見班列閣臣上

賜茶及宴恩禮有加四年冬十二月辛巳卒於家

遣布政使司官諭祭凡九

諭工部給價造墳葬祖墓北配侯氏繼配全氏並封夫人子一興變
六十六代興變字起呂順治五年三月襲封衍聖公七年晉太子少
保八年又晉少保兼太子太保九年十七年

世祖兩臨辟雍皆應

召率族人陪祀

錫賚優渥康熙六年冬十一月甲子卒年三十二

遣官賜祭葬如例公襲爵時年十三已凝重能自立臨事剛果有氣識
關里經明季冠亂禮樂不修百事廢墜幸遇

興朝重道尊師超越前古而六十五代公感激

新恩竭力修復功緒未竟旋卽告終公旣承世爵日夜以繼志爲事凡祖庭之圮壞者禮樂之殘缺者以及百事之頽廢者悉綱舉而目張之彬彬乎頓復舊制公早孤生母陶教育之旣長事陶盡孝事必稟而後行嘗語人曰人子當養母吾今尙爲母養也配馮氏繼配呂氏皆封夫人子二毓坼毓挺

六十七代毓坼字鍾在康熙六年襲封衍聖公初入觀

召見瀛臺進退禮度悉如成人及奏對復稱

旨

上爲嘉悅時公年甫十二耳八年夏四月

聖祖幸太學命應

召陪祀禮成

昭聖太皇太后召見宮中

賜之坐

垂問家世及父燮得病之由公具以對

命宮人授茶及克食辭出

懿旨命內臣送至宮門外諭從官善輔翼之

上嘗御殿公隨諸大臣朝參及退

特命由御道行公送巡辭

上敦諭乃趨出

兩宮眷顧之隆貴古今所未有也十四年晉太子少師二十三年

聖駕東巡行還過曲阜行釋奠禮復展謁聖林周覽遺蹟公因以擴林

地置守衛上請蒙

特賜地十一頃有奇除其租賦設百戶一員秩視衛守備公以

車駕幸魯隆恩異數曠古所無思編勒成書以垂不朽乃延請名流輯幸魯盛典一書上之二十八年公以祖廟建自前明弘治閒歷今二百

餘載漸就毀敝乃奏請重修時部臣以多故爲辭請俟異日

上特允所請卽發帑興工有踰舊制曲阜本彈丸邑自聖賢裔外居民無多人而地介兩河夫役之征當與他邑等棄耒耜而親畚鍤民甚苦之公爲白於撫臣河臣得奏准寬免公生際承平遭逢

聖主凡有敷奏皆見施行而

錫予便蕃更不可以殫述用是感激

殊恩益自警陽嘗謂人曰某以弱齡承藉先澤荷

朝廷格外褒崇不責以有司之事而使養尊處優以悠游在此位者雖萬死不足以報稱故自少至老敦率禮義倡明教學日以風俗人心爲己任冀上答

聖天子右嚮儒術之盛心而下亦不致廢墜祖宗遺澤爲大戾蓋其夙夜敬慎不敢居盛滿而稍自放軼者五十餘年如一日也雍正元年特典追封孔子五代王爵公時年六十七矣冬十月入

朝謝得疾臥邸第

上遣御醫劉聲芳診視并

賜參餌十一月丁亥卒

上爲震悼

遣內大臣奠茶酒

諭大學士會同禮臣優議卹典又

命三品以上漢官會予會送輶歸之日

特命皇三子及莊親王率內大臣四員侍衛二十員至第再奠茶酒送

殯子傳鐸力辭

皇三子曰

上命也卒叩奠成禮乃復

命仍

遣行人司司正李據護送乘傳歸里葬祖墓東北謚曰恭愍

御製碑文曰朕惟國家禮重尊師必顯庸夫後裔謹隆眷舊宜誕沛乎

殊榮稽彝典以易名樹豐碑以示卹所以廣皇仁彰聖教也爾孔毓

坼族高東魯系本素王秉性樸誠荷天家之雨露持身謙謹奉闕里

之蒸嘗勤職守於五十餘年承統緒於六十七世朕誕膺寶祚篤念

前徽晉五代之王封昭千秋之祀典爾感恩入謝忽邁沉疴奄逝還

聞良深慘惻旣厚飭終之禮復加論定之名素履允符曰恭曰愍於

戲溯泗水之淵源天章永煥望鳧山之峻峙雲碣常新爰示寵施垂

於無數不亦休哉復

命於葬日立碑日再加祭二次皆異數也公爲人純篤質實溫良樂易
未嘗有疾言遽色見於顏面爲學尙實行不喜聲華文譽所作詩文
輒焚削其橐工擘窠書兼通繪事性愛蘭因自號蘭堂所點染惟蘭
最多筆墨秀勁識者珍藏之配張氏繼葉氏黃氏皆封夫人子四傳
鐸傳鋟傳鏞傳鏞出爲弟毓挺嗣

六十八代傳鍾字振路生而恭謹和厚無圭棱及遇事當斷復剛果不可奪勇於讀書工文詞尤究心濂洛關閩之學康熙四十年授二品冠服恭慤公晚年多疾遇祀事輒命公代攝而於興建諸大務所勸贊尤多公精於三禮凡廟中一器一物無不詳加訂正又以審樂尤難於考禮乃博求律呂之書冥搜默契至忘寢食久之始有所得恍然曰鍾律正則無不正而欲正鍾律在得其中聲而已此卽人心喜怒哀樂未發之中然求於空虛則無憑用以私智則近鑿泥於器物則失真典午而下多求之金石梁隋以後多徵之秬黍至王朴則專於秬黍而不復考之金石夫金石有古今而秬黍有長短皆不可盡信惟用蔡氏更造淺深之法以理合數以數合器以器求聲而黃鍾可得大樂可成所謂中爲大本由心而生也雍正元年襲封衍聖

公二年

遣行人顧持禮召取入京陪祀時公年五十二患足疾

上軫念步履艱難

命其次子繼溥代替行禮是年六月癸巳祖廟祭公素服三日哭引咎自責疏入

上遣禮部侍郎王景曾來闕里祭告傳

旨慰問尋大發帑金

命禮部侍郎畱保山東巡撫岳濬前巡撫陳世倌率屬興建而以公共

董其事又

諭廟中有應添設者可直言無隱公因奏增樂器庫值房諸處皆得

貞愈允明年

賜御書欽承聖緒四字七年

賜

世祖御製人臣儆心錄

聖祖御製文集詩經春秋傳說彙纂周易折衷性理精義朱子全書資治通鑑綱目古今圖書集成歷代紀事年表四朝詩全唐詩律歷淵源音韻闡微萬言廣訓及

御製朋黨論周易本義周易義例啓蒙附論日講四書易經書經解義性理大全淵鑑古文康熙字典淵鑑類函繹史佩文韻府凡二十七種碑藏闕里八年廟工成率族人入

朝謝

頒賜稠疊明年

詔修孔林仍

命公同陳世倌監理時公疾以沉疴難起上疏乞休蒙

恩子告而以長孫廣榮襲世爵然公感激

國恩尚力疾從事閱歲工竣復開館纂修闕里盛典一書以紀

朝廷重道崇儒之至意十三年夏四月癸亥卒年六十三

賜祭葬如故事葬祖墓東北配王氏繼配李氏徐氏王李皆贈夫人徐封太夫人子六繼謨繼溥繼洞繼汾繼涑繼澍繼澍出嗣弟傳鏞六十九代繼謨字體和好讀書能強記席豐履厚處以謙冲克守先聖持滿之訓年二十三而卒康熙五十八年也雍正十三年贈衍聖公配王氏封太夫人子二廣榮廣祚

七十代廣榮字京立雍正二年年十二以衍聖公嫡長孫授二品冠服好經術嫻禮儀歲時慶賀嘗隨祖父入覲九年襲封衍聖翁明年秋八月以林工告竣率族人入謝世宗以廣榮嗣封至是始陞見

詔大學士會同禮臣議

召見儀欽天監諏日以是月甲戌

上御圓明園正大光明殿禮部堂官引廣榮由出入賢良左門入命坐

賜茶

諭曰至聖先師後裔當存聖賢之心行聖賢之事一切秉禮守義以驕奢爲戒且爾年齒尙少尤宜勤學讀書敦品勵行不但爾一人凡爾同族之人皆當互相勸戒共相砥礪爲端人正士爾等果能遵朕訓諭學問日進品行純謹不墜家聲卽所以報國矣廣棨頓首謝出賜御銘松花石硯一方蟒錦緞七疋仍依故事宴於禮部廣棨旣祇承聖訓歸益勵志於學自名所居堂曰念典與諸名士日夕講貫其中十三年夏四月祖父卒居喪哀戚盡禮秋八月世宗憲皇帝升遐入都哭臨我

皇上召見圓明園
恩禮備至是歲以

覃恩得贈父繼濩如其爵乾隆二年赴都恭送
世宗梓宮入泰陵三年春

皇上臨雍應

召入京上言元聖後裔東野氏既蒙列於五經博士而周公實先師之所誦法其後人不得與觀禮之列殊所未安乞請一體陪祀

報可時

皇上初行耕藉禮成上

親耕藉田頌

視學大禮慶成賦各一篇

上嘉覽焉四年秋入賀

萬壽會開

經筵

特令入班聽講明年秋再預

經筵因奏請著爲令

詔從之六年以曲阜知縣毓璫不職列狀上告毓璫亦訐以數事

上命大臣同巡撫會勘，勘者微不得實，有異辭。

詔原勿問，而毓瑞抵罪如議。八年春正月辛酉卒。

賜卹典如故事，廣榮性本伉爽，英毅後更事既熟，漸純粹謹密，篤於孝友，與人交不設城府，尤勇從善，下至臧獲，輒有以諭言進者，皆虛已聽受，卽不當亦弗罪也。所著述甚富，惜不享年而卒，年僅三十一耳。配何氏，封夫人子一昭煥。

七十一代昭煥，字顯明，乾隆九年襲封衍聖公。

述曰：汾自幼時從父兄後於高曾以下諸先公之懿德，蓋耳熟焉，及長得交當世名公卿嘗與先世通音接者益復聞無異詞，而學問短淺，不獲稱述，萬一又以諸先公立身本末具載。

國史及海內學士大夫之文章固不待汾而傳，茲謹敍聖朝恩遇之隆而諸先公之

君臣一德亦從可窺見，是則小子區區之意也。

閩中文獻考卷十終

闕里文獻考卷十

林廟第二之一

先聖之沒也弟子葬於魯城北泗上既葬後世子孫卽所居之堂爲廟世世祀之然塋不過百畝封不過三版祠宇不過三間歷代嗣加恢擴日就宏麗至我

朝而無可復加矣抑考汶上縣卽古之中都先聖嘗宰其邑而尼山爲先聖誕生之地洙泗乃先聖設教之區今並有世官奉書院享祀而防北舊林乃先聖考妣合葬處鄒縣中庸書院實子思孟子傳道授受之堂爰悉述其規模制度與夫興建增葺之由列載於篇

至聖先師孔子墓在今曲阜縣城北二里許面洙背泗封如馬鬣冢高一丈五尺南北廣十步東西廣十三步冢前石碑二一爲宋宣和舊碑其一則五十九代衍聖公所立也舊石祠壇唐時造四面有前人題名歲久漫滅不可讀初祠壇方六尺門弟子以瓴甓爲之漢韓

勅修墓時始易以石石方三尺厚如之縱橫各七唐更以封禪石易之今衍聖公昭煥又以其迫隘前廣新石五尺其西南爲廬墓處室三間東向內祀端木子聖墓東十步許爲伯魚子墓墓前樹石碑二聖墓南十步許爲子思子墓亦樹二碑前有翁仲二宋宣和舊物伯魚子墓東南爲宋真宗駐蹕亭其又南爲我

聖祖仁皇帝駐蹕亭皆南向又南爲楷亭西向子貢手植楷在焉又前爲享殿五間循享殿而北四圍繚以周垣方一里以衛聖墓直享殿而南爲甬道中峙石鼎一旁列石翁仲二左執笏右按劒元豹二角端二華表二製極精巧雍正十年奉

勅造甬道南墓門三間其東偏爲思堂三間左右廂各三間門一間衍聖公及衆子孫更衣享餽處

今皇帝幸魯於此駐蹕其東爲土地祠又東爲神廟祭孤壇在其後墓門外爲洙水橋橋

南建石坊坊左右有下馬牌折而東爲輦路輦路南爲觀樓觀樓者卽林牆門樓也林牆周十餘里高丈許厚半之觀樓外東西列垣夾甬道其南爲至聖林門門外有坊坊左右守林人戶聚族而居卽史記所稱孔里者也又南爲萬古長春石坊左右有碑亭又南有橋曰文津橋又南卽曲阜縣城北門自縣城北門至林夾神道皆古柏森茂葱鬱其直如矢而林中古樹相傳爲諸弟子手植或云異木以百數魯人莫能識也今林中楷木居多上無鳥巢下不生荆棘及刺人草考聖林規模其初僅廣一頃子孫皆附葬焉雖魯人世以歲時奉祀孔子冢而規製守衛尙未具也至東漢桓帝永壽三年魯相韓勅修孔子墓墓前造神門一閒東南造齊廳三閒易舊祠壇以石復民吳初輩若干戶以給掃除而其制漸備宋文帝元嘉十九年冬十二月丙申詔曰昔之賢哲及一介之善猶或衛其土壤禁其芻牧况尼父德表生民功被百代而墳塋荒蕪荆棘勿翦可蠲墓側數戶以掌

酒掃種松柏六百株元魏孝文帝太和十九年夏四月帝幸魯親祠孔子詔兗州爲孔子起園栽柏修飾墳壠更建碑銘褒揚聖德唐元宗開元十三年冬十一月帝幸孔子宅給復近墓五戶長供掃除周太祖廣順二年夏六月帝幸曲阜親拜孔子墓勅禁樵採宋真宗景德四年增給守冢二十戶大中祥符元年帝東封過曲阜謁孔林又給近便十戶奉塋域徽宗大觀元年詔先聖墓立賞錢十貫給告捉樵採林木者宣和元年有司請於朝命工鑄造石儀五年成峙於墓所高宗建炎二年冬十月金粘沒喝陷慶府兵至闕里軍士有欲發孔子墓者粘沒喝問通事高慶裔曰孔子何人曰古之大聖人粘沒喝曰大聖人墓安可發得軍士發泗水侯及刑部侍郎宗翰墓者十二人悉斬之元文宗至順二年五十四代孫曲阜尹思凱以樵牧難禁始作週垣建重門明太祖洪武十年魯民居文約等以地五十畝增廣林田成祖永樂二年五十九代衍聖公惠思堂基制狹小

當金元閒權主祀事五十代孫稀雖經補葺而未改其舊因更加恢擴又作墓門三閒二十一年林垣以歲久傾壞五十五代孫曲阜知縣克中復修葺而增拓之周十餘里建舖舍以居巡衛者英宗正統八年五十九代衍聖公又增樹文宣王及泗水侯沂國公墓碑各一孝宗弘治七年六十一代代襲衍聖公宏泰重修駐蹕亭及享殿牆門樓建洙水左右二橋植檜柏數百株世宗嘉靖二年御史陳鳳梧重修洙水橋建石坊及廬墓堂神宗萬曆二十二年巡按連標巡撫鄭汝璧葺享殿齊室樹石闕五楹題曰萬古長春立碑亭二載神道柏數百株莊烈帝崇禎七年充東兵備道僉事李一鼇十六年六十五代衍聖公先後復加修築

國朝康熙二十三年冬十一月

聖祖仁皇帝幸魯酌酒聖林

特命擴地十一頃二十四畝九分除其租賦初林地本十八頃有奇至

是共二十九頃四十一畝九分六十八代衍聖公拓新墳周之雍正八年

皇五子奉

命致祭闕里還奏孔林享堂牆垣閒有傾圮冬十二月

世宗憲皇帝諭內閣曰皇五子致祭闕里文廟典禮告成回京奏稱恭謁孔林周視規制見享堂牆垣閒有年久傾圮之處朕尊崇先師夙夜罔斁今廟貌已經鼎新林園允宜修葺著欽天監選員前往會同行聖公孔傳鐸相度方位宜於何時營治詳慎定議屆期朕命大臣前赴曲阜令衍聖公孔傳鐸協同敬謹修理務令崇閈堅固光垂永

久以昭朕尊禮先師之至意欽天監五官署正李廷耀來魯相度奏以來年七月丙子興工九年夏五月奉

旨孔林工程仍著修理闕里廟工之陳世倌張體仁等會同行聖公孔傳鐸敬謹監修其估計之處著會同該撫岳濬定議具奏岳濬陳世

信會佔奏上并請享殿瓦色依廟工寢殿之制

詔從之明年九月工成計用帑銀二萬五千三百三兩有奇

啓聖王林卽先聖父母合葬處在今曲阜縣城東三十里南對防山
北阻泗水其東南數武聖兄孟皮墓也宋以前規制不可考金章宗
明昌五年五十二代衍聖公元措始立墓碣石儀表神道明成祖示
樂聞五十六代孫曲阜知縣希範重修并立聖兄墓碑

國朝康熙十年六十七代衍聖公建享殿及墓門牆垣乾隆二十年
今衍聖公昭煥改建享殿三間林門三間華棟承檻覆以碧瓦一如
崇聖祠之制

述曰按志載林內外古蹟尚有冢壁白免溝及丹書坊其說謂先聖
墓北有虛墓五間皆石爲之先聖沒戒子弟爲虛墓後果遭秦始皇
發掘得石璧文云後世一男子自稱秦始皇上我堂躍我牀飲我酒
衆顛倒我衣裳至沙邱而亡時有白兔自墓中出始皇逐之至曲阜

西十八里溝而沒魯人因呼其溝曰白兔溝丹書坊者漢魯相鍾離意出私錢付戶曹孔訴修夫子車身入廟拭几席劙履令男子張伯除堂下草草中得玉璧七枚伯懷其一以六枚白意意令主簿安置几前其堂下牀首有懸甕意召訴問答曰夫子甕也背有丹書人莫敢發意曰夫子所以遺甕欲以垂後人因發之得素書文曰後世修吾書董仲舒護吾車拭吾履發吾笥會稽鍾離意璧有七張伯懷其一卽召問伯果服焉後埋丹書爲坊以識之其址在城北門外事皆妄誕不經大都出緯書之傳會耳茲故盡削之

闕里文獻考卷十一 終

闕里文獻考卷十二

林廟第二之二

至聖先師孔子廟在曲阜縣正南門內正南門名曰仰聖門額有萬仞宮牆四字明胡鑽宗題

今皇帝御書易之門外夾道植柏爲神路門內爲金聲玉振坊坊北爲石橋橋又北爲櫛星門門外左右列下馬碑又北爲太和元氣坊其左側爲德侔天地坊右側爲道冠古今坊又直北爲至聖廟坊又北爲聖時門五間三洞門內爲璧水橋三座橋左側爲快睹門右側爲仰高門各三閒橋直北曰弘道門五間又北曰大中門五間二門左右皆有角門又北曰同文門制如大中漢魏隋唐諸碑在其下門左右不設垣甬道旁列前明四御碑又北爲奎文閣七閒敬藏

賜書

墨寶於其上奎文閣名金明昌五年章宗所命也閣左右掖皆有門門

左右值房各五間爲廟庭有司齊所其東南舊爲行聖公齊所恭遇皇帝三幸闕里皆駐蹕於此門西向內正齋五間敬設

寶座左右廂各三間進奎文閣而北東出有門曰毓粹其西出門曰觀德各三間閣後碑亭十有三座一爲

聖祖仁皇帝御製孔子廟碑一爲

御製重修孔子廟碑一爲

世宗憲皇帝御製重修孔子廟碑一爲

遣皇五子祭告孔子文碑一爲

今皇帝御製孔子廟碑其四爲我

閒列戟二十四中楹懸
朝遣官祭告孔子文又其四則唐宋金元諸碑也直北爲大成門五

閒功化同流兩掖門左曰金聲右曰玉振進大成門左側爲先聖手

植檜考手植檜本三株宋時大成門內有御贊殿二檜在殿前高丈餘圍一丈四尺在左者文左紐在右者文右紐一在杏壇東南隅高五丈餘圍一丈三尺枝蟠屈如龍形世謂之再生檜晉懷帝永嘉三年枯死隋恭帝義寧元年復生唐高宗乾封二年又枯死宋仁宗康定元年復生金宣宗貞祐二年春正月廟燬於兵火三檜無復子遺元世祖至元三十一年復萌芽生東廡廢址隙閒三氏學教授張頤移植故處明孝宗弘治十三年廟灾復燬於火

國朝雍正十年廟工告竣復生新條今高一丈許矣又北爲杏壇考杏壇在宋以前本爲廟殿舊址宋天禧閒四十五代孫道輔監修祖廟移殿於北不欲毀其故蹟因莊子有孔子遊乎緇帷之林坐休乎党懷英篆又北爲大成殿九閒殿中奉至聖先師像執鎮圭冕十二旒服十二章南向左右列四配十二哲先賢像執躬圭冕九旒服九

章東西向皆元衣纁裳正位前陳法琅供器五雍正十年

欽賜又漢陶太尊一銅犧尊象尊山尊雷尊各一漢章帝元和二年物也殿枋上懸額四一爲

聖祖仁皇帝御書曰萬世師表一爲

世宗憲皇帝御書曰生民未有二爲

今皇帝御書曰與天地參曰時中立極兩楹懸對聯三

世宗憲皇帝御書曰德冠生民溯地闢天開咸尊首出道隆羣聖統金聲玉振共仰大成二爲

今皇帝御書曰氣備四時與天地鬼神日月合其德教垂萬世繼堯舜禹湯文武作之師曰覺世牖民詩書易象春秋永垂道法出類拔萃河海泰山麟鳳莫喻聖人殿東西兩廡列從祀先賢先儒皆木主兩廡中間各闢翼門左通崇聖祠右通啓聖祠大成殿後爲寢殿七間奉至聖先師孔子夫人主殿左右掖有門各一間左達神庖及后上

祠右達神廚及瘞所寢殿後爲聖蹟殿門一間進爲聖蹟殿五間藏聖像及聖蹟圖諸石刻內行教像皆碩愷之畫宋太祖及真宗贊四十七代孫傳記曰家廟所藏衣燕居服顏子從行謂之小影於像最真唐劉禹錫新州廟碑謂堯頭禹耳華冠象佩取之自鄒魯者卽小影也又凭几像唐吳道子畫贊同前四十六代孫宗壽記曰家藏唐吳道子畫先君夫子按几而坐從以十弟子者亦謂之小影其立而顏淵侍者謂之行教行教已有石本小影但摩傳之慮久而訛今亦刻之堅珉庶人不失其真也又司寇像二皆摩吳道子畫又燕居像二一吳道子畫宋米芾贊一失名明陳鳳梧贊又乘輶像一先聖服司寇服乘安車一人執輿一人策馬十弟子從行又聖蹟圖百二十幅無款聖蹟殿東南爲后土祠門一間祠三間又東北爲神庖門一間正室五間東西廂各五間聖蹟殿西南爲瘞所門一間內瘞坎如正位配位及從祀各壇之位又西北爲神厨制如神庖出大成門外

循金聲門而東爲承聖門三閒進爲詩禮堂五閒中懸

今皇帝御書額曰則古稱先聯曰紹緒仰斯文識大誠小趨庭傳至教
學禮學詩堂東廡爲禮器庫庭中有唐槐樹一宋銀杏樹一按詩禮

堂本孔子舊宅宋真宗幸魯嘗御此堂回次兗州仍賜本家爲齊廳
今毓粹門外尚有故宅門舊蹟詩禮堂後爲孔子故井井西爲魯壁
舊址昔魯共王壞壁聞金石絲竹之音後卽其地爲堂名曰金絲前
明闢東廡始移金絲堂於啓聖祠前而此其故基也其北爲崇聖祠
五閒祀肇裕詒昌啓五王及從祀先賢先儒東階下有孔氏世系碑
又北爲家廟五閒中祀始祖考妣左祀二世祖考妣右祀三世祖考
妣又左祀中興祖考妣大成門外循玉振門而西爲啓聖門三閒進
爲金絲堂五閒堂西廡爲樂器庫堂北爲啓聖殿五閒中奉啓聖王
像執躬圭冕九旒服九章又北爲寢殿三閒奉啓聖王夫人主廟四
圍皆周以崇垣四隅各起角樓以垣爲址廟中碑碣如林擇其尤雅

者載藝文考中樹木蓊鬱老榦參天多漢唐舊植舊有古柏二十一株經歷漢晉其大數十圍宋江夏王劉義恭悉遣人伐取之今廟樹最古者檜多而柏少大成殿及大成門並覆黃瓦廊廡綠瓦黃脊崇聖啓聖祠杏壇詩禮堂金絲堂奎文閣聖蹟殿悉綠瓦皆華榱石柱飾以金碧大成殿榜大成門榜皆

世宗憲皇帝御書而聖時弘道二門名又

世宗憲皇帝所命其聖時弘道大中同文四門詩禮金絲二堂奎文閣杏壇諸榜皆

今皇帝御書也考廟之始本因孔子舊宅周末時卽孔子所居之堂爲廟廟屋三間孔子在西間東向顏母在中間南向夫人隔東一間東向牀前有石硯一枚孔子平生時物廟又藏素所乘車及几席劔履漢明帝永平中曾相鍾離意嘗出私錢萬三千付戶曹孔訢治夫子車獻帝時遇火被焚魏文帝黃初二年春正月詔魯郡修起舊廟置

百石吏卒以守衛之西晉之亂關里被寇廟貌荒殘晉孝武時清河李遼上表曰臣聞教者治化之本人倫之始所以誘達羣方進德興仁譬諸土石陶冶成器雖復百王殊禮質文參差至於斯道其用不爽自中華湮沒闕里荒毀先王之澤寢聖賢之風絕自此迄今將及百年造化有靈否終以泰河濟夷徙海岱清通黎庶蒙蘇冕藻奮化而典訓弗敷雅頌寂蔑久凋之俗大弊未改非演迪斯文緝熙宏猷將何以光贊時雍克隆盛化哉事有如賸而實急者此之謂也亡父先臣回綏集邦邑歸誠本朝以太元十年遣臣奉表路經關里過觀孔廟庭宇傾頓軌式頽弛萬世宗匠忽焉淪廢仰瞻俯慨不覺涕流既達京輦表求興復聖祀修建講學至十四年十一月十七日奉被明詔采臣鄙議勅下兗州魯郡准舊營飾故尚書令謝石令臣所須許供遺二臣薨徂成規不遂陛下體唐堯文思之美訪宣尼善誘之

勤矜荒餘之凋昧愍聲教之未浹愚謂可重符兗州刺史遂成舊廟
蠲復數戶以供洒掃并賜給六經講立庠序延請宿學廣集後進使
油然入道發剖琢之功運仁義以征伐敷道德以服遠何招而不懷
何柔而不從所爲者微所弘者大乞以臣表付外參議帝不省宋文
帝元嘉十九年冬十二月詔修先聖廟魏孝靜帝興和三年兗州刺
史李珽命工雕素聖容旁侍十子北齊文宣帝天保元年夏六月詔
魯郡以時修治孔子廟宇務盡崇煥隋煬帝大業七年曲阜令陳叔
毅修孔子廟唐太宗貞觀十一年下兗州作宣父廟高宗乾封元年
詔兗州都督霍王元軌大修文宣公廟元宗開元七年兗州刺史韋元
圭同三十五代嗣襄成侯又修代宗大歷八年兗州刺史孟休鑒修
廟門懿宗咸通十年天平軍節度使濮鄆曹等州觀察使三十九代
孫溫裕上言伏以禮樂儒學教化根本百王取則千古傳風國朝宏
闡文明尊尚祀典不違古制大振皇猷今曲阜乃魯國故都文宣王

廟卽素王之故宅興儒之地孕聖之邦所宜廟宇精嚴禮物俱舉近者以兗州頻年灾歉都廢修營徒瞻數仞之牆纔識兩楹之位雖春秋無闕於釋奠而揖讓頗紊於彝章遂使金石之音靡聞於肸蠁俎豆之設嘗列於荒蕪聖域儒門豈宜堙墜臣忝爲遠裔叨領重藩咫尺家鄉拘限戎鎮望闕里而無由展敬瞻廟貌而有願興功臣今差人齎持料錢就兗州據廟宇毀傾處悉令修葺皆自支費不擾州縣所需獲遂幽懇克伸私誠伏緣兗州非臣本界須有申奏伏乞天恩允臣所請報可宋太宗太平興國八年帝御便殿顧謂近臣曰朕嗣位以來咸秩無文徧修羣祀惟魯之夫子廟堂未加營葺闕孰甚焉乃詔大將作庶材鳩工復命內侍二人董其役真宗大中祥符元年冬十一月東巡過魯勅修飾祠宇天禧二年四十五代孫道輔上章言祖廟卑陋不稱請加修崇詔轉運使以官錢葺孔子廟卽命道輔監督工役五年道輔又請得封禪行殿餘材乃大擴舊制廟門三重

次書櫻次唐宋碑亭各一次儀門次御贊殿次杏壇壇後乃正殿又後爲鄆國夫人殿殿東廡爲泗水侯殿西廡爲沂水侯殿正殿西廡門外爲齊國公殿其後爲魯國太夫人殿正殿東廡門外曰燕申門其內曰齊廳廳後曰金絲堂堂後則家廟左則神厨由齊廳而東南爲客館直北曰襲封視事廳廳後爲恩慶堂其東北隅曰雙桂堂凡增廣殿庭廊廡三百十六間仁宗景祐五年道輔又建五賢堂於齊國公殿前祀孟子及荀卿揚雄王通韓愈五子嘉祐六年賜御書飛白體殿榜神宗元豐元年冬十月詔兗州以省錢修葺宣聖祠廟五年冬十一月賜度牒三十本差本路兵士工匠令四十七代孫新泰令若升監修哲宗紹聖三年勅轉運使以省錢三千貫又加修葺四十七代衍聖公若蒙監工徽宗政和四年頒御書大成殿額金熙宗皇統二年勅行臺撥錢萬四千貫委曲阜主簿四十九代孫環修葺聖殿禁官私侵占聖廟地者四年再於行省撥錢萬四千五百貫發

南京八作見材助工役至九年正殿始成廢帝正隆二年又以羨錢修兩廊及齊國公殿世宗大定十九年五十代衍聖公摠親率族人至蒙山伐材有司出羨錢重建鄆國夫人殿章宗明昌元年帝曰昔夫子設教洙泗有天下者所當取法今遺祠久不加葺且隘陋不足以稱聖師居乃降錢七萬六千四百緡修孔子廟命幹臣領其役以二年春興工五年秋告成後金末喪亂廟貌又復殘毀元太宗九年命五十一代衍聖公元措重修官給其費屬軍興旁午僅復後殿奉先聖及十哲像世祖至元四年又恢復奎文閣十九年同知濟寧路總管劉用募民築廟垣植松檜一千本成宗大德元年濟寧路達魯花赤按檀不花行部至曲阜睹祠宇荒涼上言願自出資修葺御史臺言曲阜林廟非他處比修理盛事當出朝廷不可使臣下獨專其美不許所請四年工部上言本路已收鈔兩木石若不修蓋恐日久消費不能成就合依已擬閒架起蓋有不敷者官爲給降錢物遂於

秋八月興工冬十二月詔罷不急之役因而中止明年按檀不花以奉詔書時工役已及八分仍請修建又明年九月落成殿宇廊廡凡百二十有六楹費十萬貫有奇文宗天歷二年以闕里宣聖廟歲久漸壞勅濟寧路出官錢五萬二千緡修葺至順二年五十四代衍聖公請依前朝故事四隅建角樓倣王宮之制詔從之出山東鹽課及江西浙江學租添建順帝至元二年落成至正元年樹碑以記其事元季聖廟復就壞明太祖洪武七年五十六代衛聖公奏請修治詔從之於十年鳩工十一年落成公又補塑聖像二十年帝諭工部侍郎秦達曰春秋時人紀廢壞孔子以至聖之資刪述六經使先王之道晦而復明萬世永賴功莫大焉夫食粟則思樹藝之先衣帛則思蠶繅之始皆重其所從出也孔子之功與天地並立故朕命天下通祀以致崇報之意而闕里先師降神之地廟宇廢而不修將何以安神靈昭來世爾工部其卽爲修理以副朕懷成祖永樂九年五十

九代衍聖公又奏請重修工部請發囚徒二百三十名遣行人雷迅監督興葺十二年春正月召回雷迅更令法司撥囚一千名交孔氏子孫自督修蓋其年冬十二月帝諭工部曰孔廟至敬之所囚徒作踐不便令山東布政使司官一員率民匠三千人往修務期堅固囚徒仍聽役於外十五年夏五月畢工御製碑文紀成二十年五十九代衍聖公又改建齋廳宣宗宣德九年工部侍郎周忱以公務經曲阜捐俸修金絲堂又於廟外西南隅構堂三間爲更衣所英宗天順四年冬十月六十一代衍聖公重修啓聖王寢殿八年詔巡撫山東副都御史賈銓重修闕里先聖廟成化元年落成二年憲宗御製碑文紀成五年巡按御史林誠捐造諸賢木主十六年帝從六十一代代襲衍聖公宏泰之請發帑增廣廟制廣正殿爲九間餘皆更新二十三年工成孝宗弘治十二年夏六月甲辰廟灾詔巡撫都御史何鑑親詣相度發帑銀十五萬二千六百有奇重建正殿九間寢殿七

閒大成門家廟啓聖殿金絲堂詩禮堂各五閒移金絲堂於啓聖殿
前改奎文閣爲七閒改大門及大中門爲五閒增快睹仰高二門遷
尼山神毓聖侯祠於尼山書院以其祠爲土地祠經始於十三年春
二月落成於十七年夏五月帝親製碑文紀成功先時曲阜縣治在
廟東相距八里武宗正德七年春正月流賊劉七等犯闕里毀壞聖
廟城退按察使司僉事潘珍疏請卽廟爲城移縣附之詔可有司出
罰錢並募輸助得銀三萬五千八百餘兩秋七月興工世宗嘉靖元
年春三月工竣穆宗隆慶三年巡撫都御史姜廷願等以香稅及罰
錢一千六百兩營葺孔廟神宗萬歷六年巡撫都御史趙賢出香稅
蹟百二十圓二十二年巡按御史連標與巡撫都御史鄭汝璧以香
稅罰錢及庫羨銀三千兩重修孔廟二十九年巡撫都御史黃克纘
倡藩臬捐銀二千兩又重修三十六濟寧兵巡副使王國楨等捐

銀三百兩修西廡闕里廟堂自弘治鼎建後歷代間有營葺而工大
力微僅支罅漏遭萬歷荒祲益就傾圮四十四年四氏學生孔尙孝
等言於巡按御史畢懋康懋康遂疏於朝且言向來估計僅需十萬
五千兩有奇後此日甚一日所費將至鉅萬竊見胡良巨馬梵宇神
宮無不莊嚴而金碧之今議修孔廟視佞佛而施檀越利涉而成興
梁者其輕重緩急何如昔漢高過魯以太牢祀孔子識者謂劉氏四
百年基業其精神命脈蓋在於此然則皇上何惜此區區者倘慨渙
德音亟發帑金而一新之則皇上之所以培千萬世精神命脈者在
此舉矣疏入報聞而事竟不行天啓六年曹州州同某捐修大中門
國朝順治十二年山東巡鹽御史王秉乾出銀二千兩並勸所屬公
捐修奎文閣而提學僉事戴京會施閭章等先後又略爲補葺康熙
二年分守東兗道參議張弘俊等重修聖蹟殿奎文閣及廟門碑亭
角樓十六年六十七代衍聖公續修詩禮堂金絲堂及諸門坊橋欄

二十八年上疏請重修祖廟格於部議奉

聖祖仁皇帝特旨闕里聖廟崇奉先師萬代瞻仰今旣日漸毀敝理宜
修葺著差工部內務府官員前往確估秋九月內務府廣儲司郎中
皂保工部營繕司郎中壽卿赴闕里估勘等

命皂保同工部虞衡司郎中阿爾碑監修於三十年夏四月興工三十
二年秋八月告成凡修大成等殿五十四間大成等門六十一間兩
廡八十八間櫺星門一牌坊二用帑銀八萬六千五百兩有奇

聖祖仁皇帝御製重修孔子廟碑雍正二年夏六月癸巳廟灾

世宗憲皇帝遣署工部侍郎馬職會同山東巡撫陳世倌布政使博爾
多相度重修秋七月少詹事錢以培奏闕里文廟應令內外儒臣捐

資營建

諭曰前聞孔廟被災卽降旨遣大臣前往作速估計動支正項錢糧擇
日興工務期規制復舊廟貌重新質錢以培所奏內外大小臣工幼

業詩書仰承聖澤各宜捐資修建等語雖爲富理今有旨已令動支錢糧不必再令臣工捐資但朕亦不必阻儒士之私情今直省府州縣文廟學宮或有應修者本籍科甲出身見任之員及居家進士舉人平日讀聖人之書理宜飲水思源不忘所自如有情願不必限以數目量力捐出修理各該地方文廟學宮並祭器等項其不願者不必強勒既而馬臘罷

詔巡撫陳世倌同藩臬監修以三年秋八月興工七年春正月

諭曰關寧文廟工程朕屢降諭旨令該督撫等遴選賢員敬謹修造務期堅固輝煌計日告竣其所以未遣專官督督者蓋恐京員到彼又多日用僕從之費擾累於地方也乃原任巡撫陳世倌委用不得其人於前而塞楞額又復因循怠忽於後以致工程遲緩未能卽速告成頃據巡撫岳睿奏稱祇因購求大木一時難得是以工作稍遲等語著通政使畱保前往曲阜督率在事人員盡心竭力敬謹辦理克

期竣事以慰朕懷二月

命署山東巡撫岳濬會同畱保督催其原任山東巡撫陳世倌仍回山東率從前承修遲悞之知府州縣分別解任在工辦理其督催遲悞之各上司交畱保查明交部議處又奉

旨此次修理文廟工程務期巍煥崇閣堅緻壯麗纖悉完備燦然一新著岳濬畱保會同行聖公詳加相度倘舊制之外有應行添設者有應加修整者俱著估計奏聞添發帑銀葺理丹牆總期經理周密毫髮無憾工成之日朕當親往瞻謁以展尊禮先師至誠至敬之意又諭闕里文廟正殿正門用黃琉璃瓦兩廡則用綠琉璃瓦而以黃瓦鑲砌屋脊供奉聖像選內務府匠人到東用脫胎之法敬謹裝塑冬十一月戊戌正殿將上梁前二日內申卿雲覓於闕里歷午未申三時不散廷臣請宣付史館以昭天人感應之慶

諭曰朕平素尊奉先師至誠至敬雍正二年闕里文廟不戒於火比時

廷臣援明代弘治前事爲言而朕心悚懼不寧引過自責親謁大學

文廟虔申祭告特發帑金命大臣等督工建修凡殿廡制度規模以至祭器儀物皆令繪圖呈覽朕親爲指授遴選良工庀材興造虔恪之心數年以來無時稍閒今大成殿上梁前二日卿雲見於曲阜卿等歸美朕躬之詞朕不克當或者

上帝先師鑒朕悚惕誠敬之心見茲雲物昭示瑞應朕不敢矜言祥瑞但能功過相抵朕之幸也應擇日躬詣太學文廟祭告以申感慶之衷一切禮儀着該部速議具奏八年秋八月工成

御製重修孔子廟碑紀成是役也凡用帑金十五萬七千六百兩有奇乾隆十九年今衍聖公昭煥重修櫺星門易以石

述曰天下文廟之制上自太學下及各直省州衛郡邑莫不易以木主而闕里尙用塑像或曰塑像非古也古者廟則有主以依神祭則有戶以象神無所謂像設也自戶事廢而像事興蓋自佛氏入中國

始以異端之教而上施於聖人不經莫甚焉其說誠似矣顧猶有疑者考佛之入中國始於漢明帝而文翁石室已先有孔子坐像又國語云越王命工以良金寫范蠡之像而朝禮之宋玉招魂云像設君室靜安閒些則是周時已有此制不始於西來白馬也今闕里廟之有像或云起自東魏李珽考顧藹吉隸辨引漢韓勅後碑有改畫聖像如古圖語又水經注云闕里夫子舊廟有夫子像列二弟子執卷立侍穆穆有詢仰之容又云西北二里有顏母廟廟像猶嚴蓋珽之前已先有畫像至珽而更設塑像耳夫禮有其舉之不敢廢也况闕里爲孔氏家廟影堂之制亦先儒所不棄使後之子孫入室出戶有以睹形容而致其慎聞僂見之誠亦聖人祭如在之義也又按祖庭廣記云先聖生有異質凡四十九表反首洼面月角日準河目海口龍頸蛇唇昌顏均頤輔喉駢齒龍形龜脊虎掌駢脇修肱參膺圩項山膺林背翼臂注頭阜腴堤眉地足谷竅雷聲澤腹修上趣下末雙

後耳面如蒙俱手垂過膝耳垂珠庭眉有一十二彩目有六十四理立如鳳峙坐如龍蹲手握天文足履度字望之如朴就之如升視若營四海躬履謙讓胸有文曰制作定世符身長九尺六寸腰大十圍語出諸子似多傳會但載入家乘已久姑畱爲考古之助又家見藏紙本像三絹本像五紙本者一爲燕居像失名一爲唐吳道子畫司寇像一爲明蜀惠王朱申鑿摹吳道子司寇像絹本者一爲宋人摹吳道子司寇像有明神宗書宋高宗贊一爲杏壇講禮像石壁下老松盤曲文杏雜列先聖執如意凭几講授弟子拱立受教者一人執香爐立者一人拱手侍者二人羣聚請業者十有六人內一人抱琴三人執卷餘或拱手或斂袖或曳杖或行相問答凡弟子在列者二十人宋李唐畫一爲觀敲器像明郭翊畫一爲行教像從二弟子衣褶書論語半部一爲冕服像皆失名

闕里文獻考卷十三

林廟第二之三

尼山書院在尼山東麓繚以周垣環植檜柏正南爲大成門三閒中爲大成殿三閒祀先聖及四配像左右廡各五閒祀十一哲及七十二賢木主殿東西各有側門左右各有掖門由掖門達殿後爲寢殿三閒祀先聖夫人主兩廡各三閒祀二世祖三世祖出西側門爲毓聖侯祠門一閒祠一閒又西爲啓聖祠門三閒正殿三閒祀啓聖王主寢殿三閒祀啓聖王夫人主出東側門爲講堂三閒後爲土地祠一閒大成門外東南隅有觀川亭西南有石橋跨智源溪上考周太祖顯德中兗守趙某以尼山爲孔子發祥之地始創廟祀宋仁宗慶歷三年四十六代文宣公始卽廟爲學立學舍置祭田後毀於兵火元文宗至順三年五十四代衍聖公用林廟管勾簡實理言請復尼山祠廟薦彭璠爲官師奉祠疏下禮部奎章閣大學士康理夔夔力

主之議上中書不果行順帝至元二年復以中書左丞王懋德言置尼山書院以璠爲山長三年璠以私錢草創堂宇而山東東西道肅政廉訪使分司楊訥會同六十五代衍聖公倡率所屬及齊魯士大夫共成之乃作大成殿大成門神廚明倫堂及東西齋塾毓聖侯祠觀川亭塑聖像造禮樂器以四年春三月經始秋八月告成至正十四年鄒縣達魯花赤馬哈麻復塑四配像三十一年鄒縣尹司居敬改造孔子石像於坤靈洞中章甫逢掖如古禮明成祖永樂十五年五十九代衍聖公率族人重修增建啓聖殿及寢殿於西偏孝宗弘治七年六十一代代襲衍聖公宏泰五十八代孫三氏學學錄公璜以修文廟餘資重葺

國朝康熙十三年六十七代衍聖公又加修飾易圍牆以磚石雍正二年六十八代衍聖公以歲久漸圯更爲鼎新乾隆二十年今衍聖公昭煥復率族人出資重修

洙泗書院在曲阜城東北八里泗水經其北洙水帶其南廟制大成殿五間祀先聖四配十二哲東西廡各三間前爲講堂三間又前爲書院門三間四周繚以重垣考書院乃孔子故講堂也舊亦名學堂漢時諸弟子房舍并寃猶存建武五年光武帝擊破董憲於昌慮還過魯坐孔子講堂顧指子路室謂左右曰此吾大僕之室也其後學廢遺址存焉元順帝至元閒五十五代孫曲阜縣尹克欽始因舊址創書院設山長一人奉祠明孝宗弘治七年六十一代代襄衍聖公宏泰同學錄公璜重葺世宗嘉靖三年巡按御史李獻捐資重建熹宗天啓七年六十二代孫曲阜知縣聞簡重修

國朝順治八年六十六代衍聖公復加補葺十三年六十五代孫曲阜知縣行淳康熙三十八年六十六代孫曲阜知縣興認皆捐俸重修

聖澤書院在汶上縣城中大成門三間大成殿三間祀先聖像配以

顏子及曾子像兩廡各三間祀十一哲七十二賢及諸先儒木主書院舊在縣城西南五里湖之側始建於元魏明帝孝昌元年唐吳道子畫宣聖及堯國公像其中徐浩題額顏真卿撰記宋哲宗元祐四年縣令周師中重修元都水少監馬之貞建大成殿塑先聖及十哲像堂室門廡庖庫池井咸備明世宗嘉靖二年巡撫山東都御史陳鳳梧檄知縣吳瀛移建城中穆宗隆慶元年知縣趙可懷神宗萬歷元年知縣張惟誠二十八年知縣尚瓊先後重修

國朝康熙五十一年六十八代衍聖公爲世子時又重修

中庸書院在鄒縣城外東南隅曝書臺之東廟門三間正殿三間中祀述聖子思子左配以亞聖孟子右安述聖遺像石刻殿懸

世宗憲皇帝御書性天述祖額東西廡各三間神道中有碑亭樹今上御製子思贊石刻廟四面環以周垣考書院本子思講堂遺址也元成宗元貞初鄒尹司居敬始卽其址構堂四楹名曰中庸精舍設

思孟像春秋祀之武宗大德閒尹宋璋擴爲書院廟殿曰誠明後堂
曰率性書院堂曰景賢齋曰慎獨順帝至正中尹鄧彥禮孔之威相
繼修之明成祖永樂中知縣朱瑤英宗正統四年知縣房岳世宗嘉
靖中知縣章時鸞神宗萬歷九年知縣許守恩二十六年知縣王一
楨三十六年知縣胡繼先又先後重修熹宗天啓二年燬於兵火五年
兗州知府孫朝肅更建祠宇

國朝乾隆二十年七十一代衍聖公昭煥重修

述曰書院者本爲春秋講學而設也今廟祀雖肅而絃誦之聲無聞
戾厥旨矣顧名思義是所望於主鬯者

闕里文獻考卷十三終